


Oficialmente Ing. Marlon Croes ta bira director di DOW entrante 1 di Februari



ORANJESTAD (AAN) – Matutino DIARIO a entrevista Ing. Marlon Croes, ken for di entrante 1 di Maart proximo, lo asumi e cargo di director di DOW y Ing. Dennis Wever lo bira director interino.

Ing. Marlon Croes a duna di conoce cu Minister di Infraestructura, señor Sevinger a informe cu nan a tuma un

decision den Consejo di Minister, pa apunta su persona como Director di DOW den substitucion di Ing. Jossy Figaroa.

El a menciona cu durante e ultimo diez añanan cu el a fungi como director interino di DOW, e tabata tin palabracion cu e director riba kico ta su tarea y kico e mag haci of no.

Por ehemplo riba tur aspecto tecnico e por a tuma decision, no asina pa asuntonan di personal.

Esaki ta nifica cu e parti di personal ta, sin duda, un elemento nobo cu e tin cu pasa door di dje. El a indica cu e experiencia cu e tin no ta di dje so, pero di henter DOW, cu ta un team colectivo cu ta haci di

DOW loke e ta.

Ing. Marlon Croes a expresa cu e ta gradici cu e team cu nan tin y esun nobo cu ta bin, cu mester bay tuma over den e lapso di dos pa tres aña e funcionnan cu lo keda bashi.

Ing. Marlon Croes a señala cu aki dos pa tres aña DOW lo wordo transforma y lo por mira un gerencia completamente nobo.

Como director e lo tin cu atende diferente reunion y e tin cu sinta cu e director saliente, pasobra e tin hopi experiencia y e ta sinti cu e ta bay bisti un zapato hopi grandi cu ing. Figaroa ta laga atras, y e tin cu haci su best pa yega na e standard cu e tin. El a agrega cu Ing. Figaroa ta un director hopi dinamico y un di e mehor directornan cu e miembronan di gerencia di DOW por tabata tin. El a duna nan hopi espacio pa haci nan trabao y esey a haci nan hopi experiencia pa haci nan trabao y semper ta bon pa te na ultimo momento combersa cune, pa haya mas conocimiento for di dje.

E reto mas grandi cu nan tin aworaki ta cu diferente miembro di e Gerencia ta bayendo cu pension den e siguiente dos pa tres añanan, y esey ta haci e reto mas grandi pa esnan nobo haya conocimiento y experiencia hopi rapido.

DOW tabata mas activo cu e proyectonan cu a core pareu e ultimo cinco añanan, cu nan mester desaroya y ehecuta, y tabata e temporada di mas druk cu Ing. Marlon Croes a pasa aden, den su mas cu 25 aña trahando den DOW, y cu como ingeniero e mester a braza e situacion druk aki pa por a crece y amplia su experiencia practico den e trabao. Den number di su coleganan el a expresa cu nan a braza esaki y a pasa den remolino aki y a logra loke DOW ta representa awe. Matutino DIARIO ta desea sres. Marlon Croes y Dennis Wever hopi exito den nan reto nobo aki.

Riba potret nos por aprecia Ing. Marlon Croes y Ing. Dennis Wever, hunto cu nan director saliente, Ing. Jossy Figaroa.